

永嘉證道歌

唐 慎水沙門玄覺 撰

君不見：

- 絕學無為閑道人，不除妄想不求真。無明實性即佛性，幻化空身即法身。
- 法身覺了無一物，本源自性天真佛；五陰浮雲空去來，三毒水泡虛出沒。
- 證實相，無人法，剎那滅卻阿鼻業。若將妄語誑眾生，自招拔舌塵沙劫。
- 頓覺了：如來禪，六度萬行體中圓。夢裡明明有六趣，覺後空空無大千。
- 無罪福，無損益，寂滅性中莫問覓；比來塵鏡未曾磨，今日分明須剖析。
- 誰無念？誰無生？若實無生無不生；喚取機關木人問，求佛施功早晚成。

- 放四大，莫把捉，寂滅性中隨飲啄；諸行無常一切空，即是如來大圓覺。
- 決定說，表真乘，有人不肯任情徵；直截根源佛所印，摘葉尋枝我不能。
- 摩尼珠，人不識，如來藏裡親收得；六般神用空不空，一顆圓光色非色。
- 淨五根，得五力，唯證乃知難可測；鏡裡看形見不難，水中捉月爭拈得。
- 常獨行，常獨步，達者同遊涅槃路；調古神清風自高，貌悴骨剛人不顧。
- 窮釋子，口稱貧，實是身貧道不貧。貧則身常披縷褐；道則心藏無價珍。
- 無價珍，用無盡，利物應機終不吝；三身四智體中圓，八解六通心地印。
- 上士一決一切了，中下多聞多不信。但自懷中解垢衣，誰能向外誇精進？
- 從他謗，任他非，把火燒天徒自疲；我聞恰如飲甘露，銷融頓入不思議。

觀惡言，是功德，此則成吾善知識，不因訛謗起怨親，何表無生慈忍力？

● 宗亦通，說亦通，空慧圓明不滯空。非但我今獨達了，恆沙諸佛體皆同。

獅子吼，無畏說，百獸聞之皆腦裂，香象奔波失卻威，天龍寂聽生欣悅。

● 遊江海，涉山川，尋師訪道為參禪，自從認得曹谿路，了知生死不相關！

● 行亦禪，坐亦禪，語默動靜體安然，縱遇鋒刀常坦坦，假饒毒藥也閑閑。

我師得見燃燈佛，多劫曾為忍辱仙。

● 幾回生，幾回死，生死悠悠無定止；自從頓悟了無生，於諸榮辱何憂喜？

入深山，住蘭若，岑峯幽邃長松下，悠遊靜坐野僧家，闐寂安居實瀟灑。

- 覺即了，不施功。一切有為法不同，住相布施生天福，猶如仰箭射虛空，勢力盡，箭還墜，招得來生不如意。爭似無為實相門，一超直入如來地。
- 但得本，莫愁末，如淨琉璃含寶月，既能解此如意珠，自利利他終不竭。
- 江月照，松風吹，永夜清宵何所為？佛性戒珠心地印，霧露雲霞體上衣。
- 降龍鉢、解虎錫，兩鈷金環鳴歷歷，不是標形虛事持，如來寶杖親蹤跡。
- 不求真，不斷妄，了知二法空無相；無相無空無不空，即是如來真實相。
- 心鏡明，鑒無礙，廓然瑩澈周沙界，萬象森羅影現中，一顆圓光非內外。
- 豁達空，撥因果，莽莽蕩蕩招殃禍，棄有著空病亦然，還如避溺而投火。
- 捨妄心，取真理，取捨之心成巧偽，學人不了用修行，真成認賊將為子。

損法財，滅功德，莫不由斯心意識，是以禪門了卻心，頓入無生知見力。

• 大丈夫，秉慧劍，般若鋒兮金剛焰，非但空摧外道心，早曾落卻天魔膽。

震法雷，擊法鼓，布慈雲兮灑甘露，龍象蹴踏潤無邊，三乘五性皆醒悟。

• 雪山肥膩更無雜，純出醍醐我常納！一性圓通一切性，一法遍含一切法，

一月普現一切月，一切水月一月攝。諸佛法身入我性，我性同共如來合。

• 一地具足一切地，非色非心非行業。彈指圓成八萬門，剎那滅卻三祇劫。

一切數句非數句，與吾靈覺何交涉？

• 不可毀，不可讚，體若虛空勿涯岸，不離當處常湛然，覓即知君不可見。

取不得，捨不得，不可得中只麼得？

● 默時說，說時默，大施門開無壅塞。有人問我解何宗？報道摩訶般若力。或是或非人不識，逆行順行天莫測。吾早曾經多劫修，不是等閑相誑惑。

● 建法幢，立宗旨，明明佛敕曹谿是，第一迦葉首傳燈，二十八代西天記；法東流，入此土，菩提達摩為初祖，六代傳衣天下聞，後人得道何窮數？

● 真不立，妄本空，有無俱遣不空空，二十空門元不著，一性如來體自同。

心是根，法是塵，兩種猶如鏡上痕；痕垢盡除光始現，心法雙忘性即真。

● 嗟末法，惡世時，眾生福薄難調制，去聖遠兮邪見深，魔強法弱多怨害。

聞說如來頓教門，恨不滅除令瓦碎。

作在心，殃在身，不須怨訴更尤人，欲得不招無間業，莫謗如來正法輪。

● 旃檀林，無雜樹，鬱密森沉獅子住，境靜林間獨自遊，走獸飛禽皆遠去。

獅子兒，眾隨後，三歲便能大哮吼；若是野干逐法王，百年妖怪虛開口。

● 圓頓教，沒人情，有疑不決直須爭。不是山僧逞人我，修行恐落斷常坑。

非不非，是不是，差之毫釐失千里。是則龍女頓成佛；非則善星生陷墜。

● 吾早年來積學問，亦曾討疏尋經論，分明名相不知休，入海算沙徒自困，

卻被如來苦訶責，數他珍寶有何益？從來蹭蹬覺虛行，多年枉作風塵客。

● 種性邪，錯知解，不達如來圓頓制。二乘精進沒道心，外道聰明無智慧。

亦愚痴，亦小駭，空拳指上生實解，執指為月枉施功，根境法中虛捏怪。不見一法即如來，方得名為觀自在。

• 了即業障本來空，未了應須還夙債；饑逢王膳不能餐，病遇醫王爭得瘥。在欲行禪知見力，火中生蓮終不壞；勇施犯重悟無生，早時成佛於今在。

• 獅子吼，無畏說，深嗟懵懂頑皮韃，只知犯重障菩提，不見如來開祕訣。有二比丘犯淫殺，波離螢光增罪結，維摩大士頓除疑，猶如赫日銷霜雪。

• 不思議，解脫力，妙用恆沙也無極。四事供養敢辭勞，萬兩黃金亦銷得，粉骨碎身未足酬，一句了然超百憶。

法中王，最高勝，恆沙如來同共證，我今解此如意珠，信受之者皆相應！

• 了了見，無一物，亦無人，亦無佛；大千沙界海中漚，一切聖賢如電拂。

假使鐵輪頂上旋，定慧圓明終不失。

• 日可冷、月可熱，眾魔不能壞真說；象駕崢嶸慢進途，誰見螳螂能拒轍？

大象不遊於兔徑，大悟不拘於小節，莫將管見謗蒼蒼，未了吾今為君訣。